

*Mefchede.*

**G**Odeschalckus & Theodoricus in Vuestphalia nati & educati sunt. Hi fratres sese Erdfordiam studiorum gratia contulerunt, atq; magnam uterq; eruditionem nacti sunt. Senior autē Theologiae incubuit, atque adeò profecit, ut Doctor creatus, publicus eius facultatis professor constitutus fuerit. quam etiam functionem magna cum auctoritate diu ibidem obtinuit. Scripsit etiam quaestiones varias disputatas, atque sermones & collationes. Frater autem iunior Theodoricus artium & Medicinae Doctor factus, sese Moguntiam recepit, atque ob ingenij promptitudinem & omnifariam eruditionem, ab omnibus dilectus est. Ibi

de conseruanda sanitate tempore pestis tractatum composuit. Habuit is filium Theodoricum qui uix quindecim annorum existens, multos profectae aetatis claros homines, sua eruditione & facundia superauit. Scripserat is librum insignem de septem artibus liberalibus ad Tritthemium abbatem, ita ut multis suo ingenio stupori & admirationi fuerit. Floruerunt anno millesimo quadringentesimo septuagesimo.

Tritthemius.